



**Adami Tanneri E Societate Iesv, S. Theologiæ D. Et In
Academia Ingolstad. Professoris, Theologiæ Scholasticæ
Tomus ...**

Cum triplici Indice

De Fide, Spe, Charitate, Ivstitia, Religione, caeterisq[ue] virtutibus [et]
vitijs: ac varijs hominum statibus. Secvndae Secvundae S. Thomae
Aqvinatis Respondens

Tanner, Adam

Ingolstadii, 1627

IV. De diuisione Iustitiæ particularis, in commutatiuam & distributiua.

[urn:nbn:de:hbz:466:1-72877](https://nbn-resolving.de/urn:nbn:de:hbz:466:1-72877)

distributio; non tamen ipsius operantis seu distribuentis, nec ipsarum etiam personarum, quibus sit distributio absolute & secundum se; sed solum per comparationem vniuersiusq; ad alios, ita vt quantum dignitas vnius & merita excedunt alios, tantum etiam pars illi distribuenda debeat excedere portiones aliorum.

Nota VIII. Quamvis iustitia etiam particularis actus aliarum virtutum imperare possit, in ordine ad suum finem, nihilominus recte à Sancto Thoma & Aristotele loc. cit. eam habere particularem materiam, non autem iustitiam legalem: non solum quod ista nullam prorsus materiam habet preter eam, quæ communis est alijs virtutibus, sed etiam, quod cum per se finem altissimum & præstantissimum habeat, cui omnia alia particularia bona deseruite debent, per se & ex sua natura circa omnium virtutum moralium actus & materiam imperando versetur: cum tamen iustitia particularis & propriæ alioquin materia habeat, & ob sui finis contractiorem rationem, non ita per se & ex sua natura, aliarum virtutum actus imperet, vt recte etiam aduertit S. Thomas hic q. 8. a. 9. ad 3.

Vnde etiam idem supra a. 6. notat, subinde etiam quamlibet virtutem, quatenus à iustitia legali ordinatur ad bonum commune, dici iustitia legale, & contra; ita vt hac ratione iustitia legalis sit idem in essentia cum omni virtute, differat autem secundum ordinem ad bonum commune, quem habet à iustitia legali; quo modo etiam subinde loquitur Aristoteles 5. Eth. 1. & 2. c. m. ait, iustitia legalis esse eandem omni virtuti, non esse partem virtutis, sed totam virtutem; item, virtus & iustitia vniuersalis eadem est, inquit; Esset tamē (seu ratio formalis) utrumque non est idem. Eadem ratione actus eleemosynæ & ieunij à charitate imperati, non nunquam actus charitatis appellantur, & contra etiā charitas ab Apostolo patiens, benigna vocatur, nimirū quia actus harum virtutum à charitate imperantur, vt dictum disp. 2. q. 4. dub. 1.

D V B I V M . I V .

De divisione iustitia particularis, in commutativam & distributivam.

S. Thomas q. 61. a. 2. 4.

Circa hanc rem queritur primo, quid propriæ sit iustitia commutativa, & distributiva; & an sint duas essentiales species iustitiae particularis. Respondeatur sequentibus assertiōnibus. I. Iustitia commutativa & distributiva sunt duas species essentiales iustitiae particularis. Ita S. Thomas cit. q. 61. a. 1. Probatur ex Aristotele 5. Eth. c. 2. vbi ponit duas partes iustitiae particularis, quarum una ait esse directiū in distributionib; aliam in commutationib;

Ratio est. Quia cum motus nomine suu ac specie desumat a termino ad quem, idcirco etiam particularis iustitia dicitur illa, quæ dirigit ordinem alicuius ad particularem personam, seu quæ habentem recte ordinat ad priuatam personas, velut partes Reipublicæ; atqui duplex est ad aliquam partem ordo direc-

tionis indigens, videlicet ordo partis ad partem; & ordo totius ad partem; isq; ita diuersus, vt in vtroq; diuersa ratio debiti & specialis difficultas cernatur: Ergo recte constituuntur duæ species particulares iustitiae; quarum una dirigit ordinem partis ad partem, ipsas videlicet partes Reipublicæ ad se invenient ordinans; ita vt per eam priuatus quisq; suo ac priuato nomine tribuat priuato, quod suu est; & vocatur iustitia commutativa; quia in commutationibus, pprie ac picipue versatur; idq; ideo, quod inter partes eiusdem Reipublicæ, una non potest ad alterius bona ius aliquod habere, nisi interueniente aliqua commutatione, seu pactio: altera dirigit ordinem totius ad partem, bona videlicet communia, seu ipsius communitatatis, debita proportione ciuib; seu eiusdem communitatatis partibus distribuens, & vocatur distributiva.

Ex quibus etiā refellit singularis quedam opinio Buridani 5. Eth. q. 7. cōtendentis, has duas iustitias sola materia, non autem essentiale specie differre; quod magis etiā ex sequentibus refutabitur. Optime S. Thomas cit. a. 1. ad 5. Iustitia distributiva, & commutativa, inquit, non solum distinguuntur secundum unum & multa, sed secundum diuersam debitum rationem. Alio enim modo debetur alicui id, quod est communis, aliorummodo, quod est proprium.

ASSERTIO II. Tamē si proprius actus iustitiae distributivæ, qui est ipsa distributio, pprie quidē sit in solo p̄fide, seu rectore Reipublicæ, & suo modo etiā in aliquo priuato capite vnius familiae, distribuente bona communia: tamē secundū habitum, atq; etiam secundū actum quandam secundariū, esse quoq; potest in priuatis quibuslibet, quatenus affectu probant iusta distributionem, eaq; contenti viuant. Ita S. Thomas eadem q. 61. a. 1. ad 3.

Ratio est; quia posita capacitate subiecti, ad p̄priū actū ac honestatē virtutis, eiusdem rationis est, actū externum virtutis exercere, & sola mente in eiusdem honestatē ferri; neq; nisi secundū extēsionē, seu quasi maius & minus, differunt distributio bonorū communium vnius regni, vel ciuitatis vel pagi, vel exercitus, vel familiæ, seu domus; quando formalis ratio honestatis & debiti, in omni eiusmodi bonorū communium distributione, eadē est.

ASSERTIO III. Iustitia distributiva, pprie illud duntaxat debitū attendit, quod ex bonis communibus alicui ideo p̄cise exoluendū est, quia communitat pars est. Ita S. Thomas eadē q. 61. a. 2. cum ait: In distributiva iustitia datur aliquid (velut debitū) alicui priuata persona, in quantum id, quod est totius, est debitū parti. Ratio est; quia hoc ipso, quod bona sunt communia, & quidē ipsi per se Reipublica, non necessaria, debentur partibus eiusdem communitatē. Idq; seruata certa quadam p̄portione, vt inferius dicetur. Quo fit, vt Princeps, vel Republica, si ex bonis Reipublicæ ciui reddat, quod ex contractu aliquo, seu propter nauatam Republica operam tenetur, iam non exercet auctum iustitiae distributivæ, sed commutativæ.

Neq; vero idem est, formaliter loquendo, bona communia partib; Reipublicæ distribuere, & bona illarum merita & obsequia in Republica collata compensare; esto materialiter vtrumq; possit cōcurrere: sicut etiam plane in bonorū communī

49

50

51

52

917 distributione, ratio quædam non solum dignitatis, sed etiam meritorum habenda est; prout videlicet ipsa etiam merita personam in tali Republica dignorem faciunt.

Ita etiam docet S. Thomas q. 61. art. 4. ad 2. vbi cum in obiectione, inter alia dictū fuisse, in iustitia distributiva spectari dignitatē personæ, quæ quidē maxime videatur attendi secundum opera, quibus aliqui communitatē seruiunt, respondet: *Quod si alius, qui communitatē seruiisset, retribueretur aliud pro seruio impensis, non esset hoc distributiva iustitia, sed commutativa. In distributiva enim iustitia, non attenditur aequalitas eius, quod quis accipit, ad id, quod ipse impedit; sed (aequalitas proportionis) ad id quod alius accipit, secundū modū utriusq; persona.*

Quæritur secundo: Quodnam mediū, quæque materia sit utriusq; Iustitia. Respondetur sequentibus assertionib; I. Mediū in iustitia distributiva sumitur & constituitur secundū proportionē, seu proportionalitatē geometricā, adeoq; secundum proportionem rerū ad personas; vt scilicet quantū vna persona excedit alia, tantū etiā res, que datur vni persona, excedat rem, quæ datur alij. In commutativa autē Iustitia, sumitur & constituitur mediū secundū proportionem arithmeticā, seu aequalitatē rei ad rem. Ita S. Thomas q. 61. a. 2. ex Aristotele 5. Eth. c. 3. & 4. vbi docet, in iustitia distributiva accipi mediū secundū geometricā proportionalitatē; quæ iuxta Mathematicos significat aequalitatē duarū proportionū inter se, & quatuor terminos cōpletebitur; è quibus sicut primus se habet ad tertium, ita secundus ad quartum. &c. in commutativa autem secundum proportionem seu aequalitatē arithmeticā.

53 Probatur & declaratur; quia cum per distributivā iustitiā detur aliquid alicui priuatæ personæ, inquantū id, quod est totius, est debitū parti, necesse est, vt tanto plus de bonis toti⁹ seu communitatē parti debitum sit, quanto ipsa pars maiorem principalitatē seu dignitatem habet in toto. Quo fit, vt per distributivā iustitiā tanto plus alicui de bonis communitatē dandū sit, quanto illa persona maiore⁹ habet principalitatē in communitate; ex quo nascitur illa proportionalitas geometricā, in qua attenditur aequaliter non secundū quantitatē, sed secundum proportionē, vt scilicet sicut vna persona excedit alia, ita etiam res quæ datur vni persona, excedat rem, quæ datur alij: ad eum scilicet modum, quo iuxta Mathematicos dici solet. Sicut se habent sex ad quatuor ita se habent tria ad duo; quia vtrōbiq; est sésquialtera proportio; in qua videlicet maius continet totum minus, & simul dimidiam partem eiusdem: cum tamen interim non sit inter ea aequalitas excessus secundum quantitatē, quia sex excedunt quatuor in duobus, tria vero excedunt duo in uno.

E contrario in iustitia commutativa attenditur aequalitas arithmeticā inter datum & acceptū; ita vt quantum acceptū est, tantum restituatur. Cum ergo mediū virtutis dicatur id ipsum, quod circa propriam virtutis materiam, per se ac formaliter per virtutem intenditur & attingitur; recte medium iustitiae commutativae dicitur consistere in aequalitate seu proportione arithmeticā; mediū

autem iustitiae distributivae in proportionē seu proportionalitatē geometricā; cum tamen virtus iustitiae conueniat in quadam ratione seu forma generali cuiusdam aequalitatis.

Nec obstat, quod non nunquam etiam in commutativa iustitia attenditur conditio persona, puta in actionibus & passionibus, quibus ipsi personæ iniuria infertur; siquidem maior est iniuria, si percutiatur Princeps, quam si percutiatur privata persona. Nam conditio persona in distributiva iustitia attenditur secundū f; in commutativa autem solum, quatenus per eam dñe, sacrificatur ipsa res, sive iniuria compensanda; eo quod in actionibus & passionibus conditio persona facit ad quantitatem rei, vt bene notauit S. Thomas q. 61. a. 2. ad 3.

ASSERTIO II. Principalitas seu dignitas personæ, pro varia ratione regiminis in diversis communitatibus seu Rebus publicis, varie attenditur vel spectatur: nam in Aristocracia attenditū secundum virtutem; in Oligarchia secundū libertatem, & in alijs aliter. Ita S. Thomas q. 61. a. 1. Ratio videtur esse; quia honores & officia, p triplice eavarietate personarum, diuersimode in diversis eiusmodi communitatib; distribuuntur: ita vt in communitate Aristocratica habeatur ratio virtutis, in Oligarchica habeatur ratio diuiniarū, in Democratica libertatis, ac popularis studij; in Monarchica autem nobilitatis, &c. Honoribus autem & officijs quadā proportionē responderet distributio ceterorum bonorum communium.

Monarchiam autē præterit S. Thomas, eo fortassis, quia in ea vt sic non inuenitur bonum commune in singulis distribuendis.

ASSERTIO III. Iustitia commutativa & distributiva differunt etiā secundum materiam; illa enim versatur circa comutationes; hæc circa distributiones. Ita S. Thomas q. 61. a. 3. ex Aristotele 5. Eth. c. 2. vbi dicit, vnam speciem iustitiae esse dæliuam in distributionib; aliam in commutationib;. Probatur & declaratur. Duplex enim materia iustitiae distingui potest, p̄pinq; vna, altera remota. Propinquas sunt iplæ operationes exteriores, puta distributio & comutatio, quas vnaquæq; iustitia immediate dirigit: remota sunt vel res, vel personæ, vel etiā opera externa, in quorū vnu vel applicatione distributio & comutatio verlantur. Quamuis ergo quidē utriusq; iustitiae materia remota sit eadē: nam & res distribui possunt ex communitate in singulos, & comutari inter se: & est etiā quædam distributio laboriosorum operum, & recompensatio, sicut & circa personas, eoruque iura vtrāq; iustitia versatur: materia tamen propinqua, quæ nimur sūnt ipsæ comutationes, & distributiones, circa exteriora illa versantes, non est eadem utriusq; iustitiae, vt dictum.

ASSERTIO IV. Comutationes, quarū directiva vel etiā emendativa est iustitia commutativa, admodum late patent, & variae sunt. Ita S. Thomas q. 61. a. 3. iuxta Aristotelem 5. Eth. c. 2. Probatur & declaratur. Quædam enim comutationes sunt inuoluntariae, ex parte scilicet vnius: quædam vero ex parte utriusq; voluntariae. Inuoluntariae

quidem

quidem, quando aliquis vtitur re alteri⁹, vel persona, vel opere, & inuito, secut^a obligatione cōpensandi damnu^m esse iniuriam: quod quidē contingit quandoq; occulte per fraudem, quandoq; etiam manifeste per violentiam.

Vtrumque autem contingit vel in rem, vel in personam propriam, aut in personam coniunctā. In rem quidē, si quis occulte rem alterius accipiat; & vocatur furtum: si autem manifeste, vocatur rapina: in propriam autem personam, vel quantum ad ipsam cōfidentiam, seu esse personā, vel quantum ad dignitatem ipsius.

Rursum quoad cōfidentiam personae, aut lāditur aliquis occulte, per dolos scilicet occisionē, seu percussiōnē, aut per veneni exhibitionē: manifeste autem, per manifestam occisionē, aut per incarcerationem; (quo spectat etiā vinculatio ab Aristotle loc. cit. nominata, & exilium,) aut per verberationem, seu membra mutilationem.

Quantum autē ad dignitatem personae lāditur aliquis, occulte quidē, per falsa testimonia, seu detractiones, quibus fama lāditur, & per alia eius generis criminā: manifeste autem, per accusationem in iudicio, seu per conuitij illationem.

Quantum autē ad personam coniunctam, lāditur aliquis in vxore, vt plurimum occulte, per adulterium; itemq; in seruo, cum aliquis seruum seducit, vt à domino discedat; quæ etiam manifeste fieri possunt. Eademq; est ratio de alijs personis coniunctis, in quas etiam possunt omnibus modis iniuriæ cōmitti, sicut in personam principale: sed adulterii, & serui seductio, sunt propria iniuria circa has personas, ita tamen vt quia seruus est possessio quedam, hæc referatur ad furtum.

Voluntaria autem commutations dicuntur, quando aliquis voluntarie transfert rem suam in alterum: quod si gratis & absque debito fiat, sicut in donatione accidit, non est actus iustitiae, sed liberalitatis. Ex debito vero iustitiae id ipsum accedit multipliciter. Primo quando quis transfert simpliciter rem suam in alterum, pro recompensatione alterius rei; sicut accidit in venditione & emptione.

Secundo, quando quis tradit rem suam alteri, concedens ei (solummodo) vsum rei, cum debito recuperandi rem. Et si quidem gratis concedit vsum rei, vocatur vſusfructus, in rebus quæ aliquid fructificant; vel simpliciter mutuum (improprie) seu accommodatum, in rebus, quæ non fructificant; sicut sunt pecunia, vasa & huiusmodi. Si vero nec ipse vſua grata conceditur, vocatur locatio, & conductio.

Tertio tradit aliquis rem suam, ut recuperandū, non ratione vſus, sed vel ratione conservatiōnis, sicut in deposito; vel ratione obligationis, sicut cum quis rem suam pignori obligat, vel pro alio fide iubet. In quibus omnibus actionibus, sive voluntarijs (peragendis,) sine inuoluntarijs (auerfandis, aut emendandis,) est eadem ratio accipiendi medium, secundum æqualitatem recompensationis. Quo fit, vt omnes istæ actiones ad unam speciem iustitiae pertineant, scilicet ad cōmutationam. Hæc S. Thomas.

Et similia habet Aristotle 5. Eth. c. 2. quamuis vtraque enumeratio non sit plane uniformis: aliquæ enim commutations enumerantur apud Aristotelem, vt aquæ derivatio, & vinculatio, quæ

non numerantur à S. Thoma; & contra quædam numerantur à S. Thoma, vt mūtilatio & derratio, quæ non numerantur ab Aristotele. Ratio videatur esse, inquit Caietanus hic a. 3. quia neuter intendit numerare integraliter species cōmutationum, sed distinguere sic, ut facile posse quis percipere omnes permutationes species, ex enumeratis. Tam enim ex his, quæ ibi, quam ex his, quæ hic dicuntur, apparet, quæ sint in his generibus computanda.

Quaritur tertio, vtrum iustum sit simpliciter idem, quod contrappassum, seu quod idem est, vtrum siue in distributionibus, siue in cōmutationibus, tam voluntarijs, quam in uoluntarijs, ex eo constituantur iustum, quod quis tale quiddā patitur, vel recipit, quale prius alterum pati coegerit, vel etiam alteri sponte dedit. Et fuit quidem olim ea Pythagoricorum, ipsiusque Rhadamenti iustissimi alioqui Cretensiū. Iudicis sententia, iustum idem esse, quod contrappassum; ac proinde pēnam talionis vniuersim loquendo, iuste irrogari.

Sed quos reprehendit Aristoteles 5. Ethic. 5. Ex cuius doctrina recte docet Sanctus Thomas hic quæst. 61. art. 4. in distributiōne quidem iustitia, ex contrappasso iustum non constitui; eo quod in hoc minime spectetur, vt pars communitatis tantum recipiat, quantum in bonum commune contulit, vt ex dictis patet.

In cōmutationi autem iustitia ait, per accidens quidem nos in unquam ex contrappasso iustum constitui; iuxta illud Exodi 21 v. 23. vbi de læsione æqualis sermo est: Reddet animam pro anima, oculum pro oculo, dentem pro dente, manum pro manu, pedem pro pede, adiunctionem pro adiunctione, vulnus pro vulnere, liuorem pro liuore: sed non semper; eo quod passio actioni respondens non semper esset æqualis, si idem specie aliquis pateretur, cum eo, quod fecit.

Nam primo quidem cum aliquis iniuriose lādit personam alterius maiorem, maior est actio, quam foret passio eiusdem speciei, si eam ipse pateretur, qui læsit. Qua ratione is, qui percutit Principem, non solum repercutitur, sed multo grauius punitur.

Secundo similiter etiam cum quis aliquem invitum in re sua lādit, maior est actio, quam esset passio, si res illa ipsi sola auferretur; tum quia ipse, qui damnificauit alium in re sua, si solum idem in specie pateretur, s̄epe nullum damnum sentiret, vt pote solum restituens alienum, quod accepit; tum quia hac ratione damnum quidem compensaretur, sed iniuria illata non item. Quæ etiam causa est, cur Exodi 22. v. 1. præcipiatur, vt si quis furatus fuerit bouem, aut ovem, & occiderit, vel vendiderit, quing^o boves pro uno bove restituat, & quatuor oves pro una ove.

Tertio etiam nec in cōmutationibus voluntarijs semper esset æqualis passio, si quis daret rem suam eiusdem speciei, pro re alterius accepta; quia fieri nihilominus potest, vt res alterius sit multo maior, quam sua, vel contra; maxime si circumstantiae loci & temporis sint diuersæ.

Vt igitur contrappassum sit iustum, curandum est, vt fiat ad æqualitatem, tam quoad æsimatiōnem iniuriæ, quam illati damni seu valoris, speccatis omnibus circumstantijs, ex quibus rei valor,

aut iniuriae quantitas dependet. Quia ratione si contra passum accipiatur, non pro eo quod est reddere, aut pati simile in specie, sed pro eo, quod est reddere aut pati *æquale*, secundum dictamen recte rationis, aut legis, tunc procul dubio contrapassum erit idem, quod iustum; eodemque sensu fortassis intelligi possunt veteres illi, ab Aristotele reprehensi, ut recte notauit Salomon q. 6. a. 4.

Dices; etiam cum iuxta citatum locum Exodi 21. inter æquales, simile in specie damnum patitur nocens, cum eo, quod innocentii prius intulit, neandum videtur constitui æqualitas inter lædenter & Iesum: quia innocens præter damnum, etiam passus est à nocente grauem iniuriam; quæ proinde simili in speciem damno non videtur satis compensari.

Respondeo satis compensati, non præcise per æquale damnum; sed quia id damnum à publico Iustitiae ministro, cum grandi probro & dedecore innocentii infertur; quo fit, ut & damnum innocentii illatum per æquale damnum, & iniuria per probrum compenfetur: securus est in cōpenfatione damni realis, quæ per se loquendo, non publice per Iustitiae publicæ ministrium, sed priuatim, per ipsum lædenter, sine eiusmodi probro, fieri potest & solet; vbi proinde merito plus restituī iubetur, quam acceptum est.

D V B I V M V.

Utrū iustitia æconomica, & vindicativa, sint propria & distincta species iustitiae.

Ad S. Thomam 2.2.q.58.a.7. & q. 51. 22.4.

70 **F**acit hæc res ad intelligendas melius iustitiae species. Et quod ad iustitiam æconomicā attinet, suppono iustitiam æconomicam esse illam, quæ est inter Patrem & filium, virum & vxorem, dominum & seruum: quam proinde etiam solum esse iustitiam secundum quid, docuit S. Thomas hic q. 58.a.7. ut pluribus dictum supra dub. 1. à n. 8. sed an sit aliqua specialis virtus dubitatur.

Prima sententia est, esse unam virtutem quandam specialem, quæ secundum triplicem illam combinationem, bonum totius domus procuret; et si pro diversa combinatione, diversa nomina sortiantur. Significat aperte S. Thomas hic q. 58.a.7. ad 3. vbi ait: *Domestica multitudine secundum philosophum 1. Polit. c. 3. & ult. distinguuntur secundum tres conjugationes, scilicet vxoris & viri, patrii & filii, domini & seruorum: quarum personarum una est quasi aliquid alterius.* Et ideo ad huiusmodi personas non est simpliciter iustitia, sed quedam iustitiae species, scilicet æconomica, ut dicitur in 5. Ethic. cap. 6. & cap. ult. Cui proinde sententia etiam fauet Aristoteles cit. 5. Ethic. 6. & 1. Polit. 3. & 8.

71 Secunda sententia est Gregorij de Valentia q. 2. pun. 2. qui nullam agnoscit specialē virtutem, bonum totius domus per se procurantē; admittit tamen respectu domesticæ multitudinis, iuxta tri-

plicem personarum combinationem, ob diversitatem debiti, ut existimat, valde notabilem, tres virtutes distinctas, quæ late loquèdo nomine iustitiae æconomica affici possint. Prima est pietà inter patrē & filiū: secunda *iustitia coniugalis*, seu æconomica, stricte accepta, inter virū & vxorem: terciæ *iustitia herilis* inter dominum & seruum.

Tertia sententia est, Petri Aragonij hic q. 58.a. 7. vbi sentit, nec specialē virtutē esse cōstituendā que per se bonū toti⁹ dom⁹ procuret, ut dicit prima sententia, quam ille vocat falsam, & contra comunē, nec iustitiā illā, qua est inter virū & xorē, dominū & seruū, vllā esse specialē virtutem, ut dixit secunda sententia; sed ad eius munia sufficere, tum legalē iustitiam, tum cæteras virtutes morales, videlicet prudentiam, fidelitatē, observantiam, obedientiam, fortitudinē, temperantiam, pro diuersitate videlicet materia & actionis, quibus bonum domus procurandū est; licet inter patrem & filiū detur specialis virtus, quæ vocatur pietas.

Et hæc sententia videtur cæteris probabilior, quam etiam supposui quæst. præc. du. 7.n.11.8. Tū quia conformis est vulgari virtutum distinctioni, secundum quam communiter, præter pietatem, nulla specialis alia virtus inter personas domesticæ multitudinis constituitur. Tum quia sola pietas habet valde diuersum obligationis fundatum; quod scilicet est, non contractus mutuus, ut inter virum & vxorem; nec lex aliqua ex iriseca iuris gentium, ut inter seruum & dominum; sed ipsa naturalis participatio eiusdem sanguinis, seu naturalis colligatio inter totum & partem. Tum quia alioquin respectu totius domus procuranda, nulla est specialis difficultas, suppositis alijs virtutibus.

Itaque sic ut ad debitum iustitiae æconomica per soluendum, in vxore & seruo, sufficiunt obleruantia, fidelitas, & obedientia; ita etiā ad debitum eiusdem soluendum in marito & domino, sufficit cum prudentia, strictior, & quasi gratuiti officiis accessu actius constringens charitas; sic etiam accedit in Praeceptore, seu confessario, ex charitate hæc officia obeuntibus: exceptis tamen ijs casib⁹, in quibus cit. dub. 7. & hac quæst. dub. 1. dixi inter eas personas esse iustum, ac iustitiam simpliciter, quæ vtq; est vna specie infima virtus.

Ex quibus etiam sequitur, iustitiam secundum quid non esse certam aliquam speciem iustitiae ab alijs virtutibus distinctam, sed comprehendit sub diuersis alijs virtutibus, ut dictum.

Quod vero ad iustitiae vindicativā spectat, intelligitur ex nomine virtus illa, quæ superiori subditu suo p̄ delictis infert condignā & debitā pœnam.

ASSERTIO I. Iustitia vindicativa, ut per eam præcise puniens ordinatur ad delinquentes, cui p̄ delictis velut superior debitam pœnam infligit, ut ita nimis equalitas inter subditum, aliquid contra suam voluntatem patientem, & eundem plus nimio sibi indulgentem, aut etiam alterum iniuriam passum, licet alioquin nullam iniuria compensationem experientem, constitutatur; adeoq; simpliciter & absolute loquendo, non est iustitia proprie dicta; sed pars potestialis iustitiae. Ita S. Thomas infra q. 80. a. vñ. & q. 108. a. 2. vbi hoc expresse doce-